

Il Comun di Montenârs al à inviât tal 2011 il progjet di publicazion on line des regjistracions dai discors e des predicjîs di pre Checo Placerean e cumò al cîr gnûfs sostignidôrs. >> DI CHRISTIAN ROMANINI



Pre Checo al torne in Rê

Al jere plui un om di pulpît e di place che di pene, i plaseve plui jessi oratôr che scrivi. Pre **Checo Placerean** (Montenârs 30 di Novembar 1920 - Udin 18 di Novembar 1986) al à dât tant al Friûl e ae nestre identitât dal pont di viste religjôs, culturâl (al à inviade lui la traduzion de Bibie par furlan, puartade insom di pre **Antoni Beline**) e ancje politic, cul so impegn tal Moviment Friûl, juste par ricuardâ cualchidune des tantis iniziativis che lu àn viodût protagonist. Purtrop però nol à lassât tant materiâl

scrit rispjet ai tancj comizis e ae tantis predicjîs che al à fat.

IL LAVÔR DAI VOLONTARIS

Cussì il Comun di Montenârs al à inviât un progjet di publicazion on line di tantis regjistracions cjapadis sù grazie ai volontaris "O vin agrât tantis personis e mi diplasarès dismenteâ cualchidun - al dîs il sindic **Claudio Sandruvi** -, ma un pinsir particular di ringraziament lu fasìn ai parincj di pre Placerean, al Istitût Ladin Furlan che al puarte il so non, a Glesie Furlane, al Moviment

Friûl, a **Adrian Cescje**, **Marco De Agostini** e pre **Bruno Buzzolini**. O ripet: chest lavôr al è stât pussibil dome grazie aes tantis personis che i àn volût ben a pre Checo e che si son impegnadis par cheste iniziative di digjitalizazion". Inviât za di cualchi timp, il progjet al à za ricevût un finanziament de Provincie di Udin dal 2011 al 2012.

L'ESEMPLI DE PROVINCIE

Claudio Sandruvi al continue: "O sperin di podê contâ inmò sul intervent di sostegnidôr che a cjapedin l'esempli de Provincie di Udin che nus à dade une man fondamentâl par lâ indevant: pre Checo al è stât un om simbul par dut il Friûl e Montenârs e je onorade di vêlu tra i siei fîs". La amministrazion e je intenzionade a continuâ te implementazion sedi pagjine sul so sît internet (www.comune.montenars.ud.it) sedi dal canâl Youtube "Comune Montenars". Cheste iniziative no si ferme ae Rê parçè che e je za in vore une azion di contat cu lis bibliotechis regjonâls dulà che la amministrazion comunâl e sta cirint documents, oparis, ineditis di pre Placerean par meti dongje une racuelte antologjiche di dut ce che al rivuarde il grant predi furlanist par podê metilu a disposizion di cui che al visitarà la biblioteche di Montenârs.

L'apel al è viert no dome aes istituzions: se cualchidun al ves a disposizion materiâl su pre Checo e al volês condividilu la amministrazion comunâl al pues contatâ il municipi o par telefon (0432981209) o lassant un mesaç sul sît dal Comun.



ilfriuli@ilfriuli.it

FINANZIAMENTI

Cuindismil euros par promovi il furlan

Il president de Provincie di Udin, **Pietro Fontanini**, al à presentât il prin ripart 2014 dai finanziaments a pro des iniziativis realizadis pe promozion de lenghe furlane: cunvignis, traduzions par Internet, publicacions, teatri, television, scuele e altri.

I sogjets che si àn dividûts i 15.000 euros previodûts de Amministrazion provinciâl a son: Union Scritôrs Furlans; Associazion Video Telecarria; Clape di culture Patrie dal Friûl; Associazion Scriptorium Foroiulense; Associazion Glesie Furlane; Associazion Ut Re Mi; Societât Scientifiche e tecnologjiche furlane; Istitût ladin furlan pre Checo.

Tal individuâ i beneficiaris, la Provincie e à tignût cont de validitât tecniche dai projets e des garanzis presentadis di bande di ogni sogjet. "La lenghe furlane e je un valôr fundamentâl de nestre identitât e la sostignin cun fuarce" al à comentât il president Fontanini.

SCOLTADIS DI DRIUS

Dediche al om

Dediche radiofoniche: "El gno par omp a l'è ta l'ospedâl."

Doman e àn di operalu. Ores dedicaî le canzon 'Uno su mille ce la fa'. Grazie".



Euronews informa

Grande Cjargne, omaç de Provincie di Udin a personaçs famôs de Cjargne

La Cjargne nus fâs continuis sorpresis. Il Pierrot, la mascare polâr de comédie dal art e simbul romantic che e ricêf ancjemò cetante fortune, e je stade rivoluzionade in sens moderni e valorizade di Fabio Sticotti di Damâr tal principi dal 1700 in Francie e, viodude la sô fortune, ancje so fi Antonio intal 1737 al continue a proponile. La storie dai Sticotti e je la prime che a atirin la atenzion dal letôr, al met dongje la descrizion di cjargnei famôs che, par vie de lôr ativitât in setôrs diferents, de lôr determinazion, des lôr capacitâts a àn valorizât la lôr tiere di origin: la Cjargne. "Une tiere vincente come che a mostrin lis storiis di cheste publicazion - a ricuardin il president Pietro Fontanini e il conseîr provinciâl delegât ae montagne Luigi Gonano che a àn volût une vore chest progjet -; iniziative che e vûl jessi un contribût di cognossince a cheste comunitât. Un stimol pes gnovis gjeneracions a crodi intes propiis ideis, a lâ daûr aes propiis ambizions ancje intun periodi difcil come chest, ma soredut a jessi braurôs des lidris, lis stessis di personalitâts cjargnelis di prin plan".

La publicazion e ricuarde la figure di Jacopo Linussio, titolâr intal Sietcent de plui grande fabriche tessile europeane; la sô storie si lee a chê dai modernis jeans. Tal setôr tessil, la Cjargne e à fat felâ di se ancje pes vicendis dai Fradis Moro, Cristoforo e Giovanni di Liussùl e dal lôr tiessût loden una vore gradît ancje dai Asbur-



go. Fra i cjargnei di fame internazionâl o vin ancje Jacopo Nicola Craighero simpri di Liussùl, poete che a Viene al puarte indevant l'amôr pal art e al devenite ami e scritôr di Franz Schubert, musicist romantic. Un grant spazi al ven dedicât ae figure di Michele Gortani, politic, gjeograf di grande relevance, grant studiôs che si spint pe sô Cjargne e che di cheste al met adun lis testimonianceis intal Museu cjargnel des tradizions e des usancis. Membri de assemblee costituente (1946-1948), al colabore in maniere decisive ae stesure dai articui 44 e 45 de Costituzione dedicâts al artesanât e ae montagne. Tal 1948 al è elet Senâtôr de Republiche. Dopo dal Jacopo Linussio des stofis, al è ancje Jacopo Linussio (Tumieç 1904-2003) de "Lamborghini ski" che al prodûs schis di ottime lavorazion, inovativs tant di jessi cirûs una vore dai sportîfs dal dopovivere. Fra lis personalitâts nomenadis ancje: Apollo Prometeo Candoni fondadôr de Seima, colôs internazionâl inte produzion di ferâi pes machinis; Fermo e Remigio Solari che di Pesaris a àn instradât la inovative industrie di orlois; Dante Spinotti, diretôr de fotografie stimât a nivel internazionâl e il chef Gianni Cosetti par vè rindût une cusine, ritignude puare, mertevule di une stele Michelin (1991), il ricognossiment plui prestigjôs dât a un ristorante.